

西北彙刊

中華郵政掛號認爲新聞紙類
 中華民國十四年十月二日發行

綏區畢克齊縣北古廣化寺後石磴二百二十四
 級有洞外建岑樓三中鏤佛像多且工風景佳絕



▲第一卷第四期要目▼

影片 綏區畢克齊縣古廣化寺

評論 西北兵工政策與兵農政策之

感言

✓ 西北移墾事業之影響於中國

調查 ✓ 河套農墾調查記

計畫 ✓ 張家口市政工程及計畫

西北軍人之特種任務

政聞錄 西北之廢物利用

西北之綜覈名實

大事記 國內大事記 國外大事記

雜俎 詩 格言 新劇

◎本社啓事

一、本刊倉猝出版勉慰 各界快靚惟祈海內鴻碩各界領袖時賜鉅製示我南針藉匡不逮至爲禱盼

二、本刊出版辱承 各機關寵賜祝詞嘉獎備至益增慚悚謹當按登以誌謝悃用答 雅意

三、本刊徵集西北風景名勝古蹟照片迭承 京綏路局局長及毛代署長塞北稅關監督豐鎮縣農會溫會長慨贈多枚勝蹟濛濛期共欽賞雅人韻事感謝奚似并望各界有此珍藏或臨時攝照者多多惠寄以便公諸同好禱切盼切

祝詞

察哈爾都統署政務廳長范慶煦

山川蒼莽。鬱居良方。漢蒙雜處。安故蹈常。文化未敷。習俗鮮良。端賴牖啓。如翼如匡。軻歷宣導。或恐未詳。載諸簡編。期以久長。奉爲圭臬。貯錦襲緇。珍同謨誥。溢美流芳。文翁雅化。弦歌播揚。平原絲繡。頌禱無疆。風移俗易。歲樂民康。金石永壽。日月爭光。

評 論

●西北兵工政策與兵農政策之感言

舌存

中國三代以前。兵農不分。皆寓兵於農。實行兵農政策。故國家有兵之用。而無養兵之費。有兵之利。而無多兵之害。嗚呼。何其盛也。降至春秋戰國。各國兵車及蒼頭奮擊等。動以數十百萬計。然如楚設兩廣。齊寄內政。法日加密而兵日增。兵不擾民。民盡知兵。亦卒能稱霸中原。雄視一時。是猶兵農合一之效也。三代以降。兵農漸分。而如秦令三十萬大軍築長城。漢命大兵屯田塞外。唐府兵數十萬更番屯墾。兵農雖有分之之勢。有時尙收合之之利也。自宋免役法興。兵農始劃然由合而分。且一分不復能合。於是兵爲民累。國家徒耗養兵之費。而不能復收兵之實用矣。民國肇造。兵制混淆。兵日益多。大爲閭閻之害。識者爭倡爲裁兵之論。究之裁者卒鮮。卽裁者亦不久去而之盜。兵匪循環。害乃加甚。孫中山輩始倡言兵工政策。天下聽之。而行之者亦甚尠。幸最近西北當局。極端的實施兵工政策。如在張垣之植樹也。建屋也。築路也。修

橋也。掘河也。作壩也。工廠作工也。熙熙攘攘。幾不復知其爲兵也者。已令人觀之而起敬。望之而生畏矣。至包磴汽車路之創築。五原漢唐八渠之恢復。包寧鐵路之興工。（事詳政聞錄）計凡一師一旅前往工作。不數月已工程猛進。成績燦然。是以消耗之兵。一變而爲生產之兵。各處擾民之兵。此獨變爲福國利民之兵。其成效已大可見矣。况當局現更進一步。擬且實行兵農政策。將察綏兩區荒地。劃出若干區。每兵授田百畝。俾自食其力。從事耕種。化干戈爲鑿鋤。鑄劍戟爲農器。使國家既無養兵之費。且收勸農之利。舉西北數千年尙滯於游牧時代者。今則一變而爲農業時代。再變卽爲工業時代。是以前進化。經數千年尙滯於第一級者。今則一變進爲農。再變進爲工。且不難同時卽進於工商時代。而與各國之進化略相等。前之進化遲。今之進化速。前之兵農工分爲三。今之兵農工合爲一。卽兵卽農。卽農卽工。其生產之力既鉅。進化之速率亦較捷。豈非西北數千年鬱久必發之機。積之既久。始一發而不可復遏。今乃假西北當局之手以促成之。而爲西北前途之幸福也歟。今統計最近全國之兵。約達二百四五十萬。爭城爭地。病國病民。以致官兵如篋。盜匪如毛。卽有一二欲裁兵以爲之倡者。亦苦無現餉以遣散之。無善法以安插之。卽使退伍而無相當職業。仍多聚而爲匪。甚非根本解決之計。

惟有實行兵工政策與兵農政策。既足以弭天下之大患。又足以興天下之大利。兵即農工。固毋須退伍。即退伍又復爲農工。仍足以謀經濟之獨立。而有以自給。豈非公私兩利之道哉。試觀歐戰各國。初莫不大兵數百萬。戰後乃多改爲工兵。使專從事生產事業。常備軍僅各數十萬而已。如俄赤衛軍百五十餘萬。現僅留五十萬。餘盡編爲勞働軍。即其顯著之例也。今西北當局獨首實行兵工政策。與兵農政策。是不獨上追中國之古制。且與歐洲各國。亦東西相輝映也已。甚望西北當局再接再厲。務推廣其範圍。胥國民軍而使爲工農化。有以收最後之效果。而全國之苦兵多者。亦皆蹶然而起。迅有以善其後也。（完）

●西北移墾事業之影響於中國

宮廷璋

1. 內地人稠食少而西北地曠人稀
 2. 墾荒及救濟人多之方法各三
 3. 移民墾荒之影響凡六
 4. 關地不患人多
- 中國約每三十年一小亂。百年一大亂。二百年易一朝。蓋人口以幾何級數遞增。而食物只以

算術級數遞增。閱數十百年。人無所得食。則不得不相爭殺。逮人死大半。食物有餘。天下始獲一時太平。今中國亂機又動矣。本部各省人口多者每方里有九十八人。少者每方里有十人。咸恃農產以爲生。然而地利有限。農產不足。加以水旱成災。人多失業。故老弱轉死溝壑。壯者每鋌而走險。腹地人滿爲患。既如此。顧西北邊徼情形則迥異。最盛者每一方里尙有十餘人。最少者每三方里始有一人。大好山河。任其荒廢。於是強鄰虎視眈眈。離間我蒙藏。侵略我邊陲。幾欲乘間操戈入室矣。有空地而不自居之。坐視強敵蠶食。是謂齎盜糧而資寇兵。有餘衆而不以實邊。坐令窮極思亂。是謂閉戶自殺。中國人非下愚。能不急起挽救耶。

古來開墾荒地之法有三。(一)民力足而用未得其當者。則導民善用之。如龔遂爲渤海太守。教民耕稼。民皆賣劍買牛。賣刀買犢是也。(二)民力不足。則用兵屯田。如趙充國之於羌。諸葛亮之於五丈原。是也。(三)本地民少。則招徠遠方之民。如商鞅廢井田。以誘三晉之民。孫權收山越之衆。至於帆海。絕徼。俘執島夷而用之。諸葛亮亦拔隴上家屬。以還漢中。是也。至於人稠食少之救濟法。亦有三。(一)闢新生路。如管仲治齊。除農業外。兼收魚鹽之利。是也。(二)移民就食。如梁惠王所謂河內凶。則移其民於河東。猶爲暫時之計。若近代歐美各國之殖民。則永久計也。(三)不

必移民而惟善盡地利。如孟子所謂不違農時則穀不可勝食。與今日西人所謂深耕 Intensive Culture 皆是也。此六法原可同時並舉。而開墾荒地尤爲急務。荒地開闢。則移民就食。不必在本地別尋生產途徑。多增生產物品。而民自無凍餒之憂。今馮督辦銳意開墾西北一帶。首從綏察兩區起。用部下健兒以屯田。招關內農民以殖邊。附近蒙民亦漸棄其游牧之俗。改學耕種。是開墾之三法俱在進行中。循茲推廣以及他區域。則其有造於國者。雖不可以道里計。而姑舉其影響之犖犖大者。表而彰之。亦足以勸世歟。

一、消弭內亂。中國內亂頻仍。似全由政客播弄。軍閥爭雄。實則由人口過密。實業不興。遊民力無所施。相率爲姦。軍閥利用之以爭權利。政客乃從中挑撥以圖分潤。一旦軍隊解散。盡變爲匪。鄉民不堪匪擾。亦甘被脅從。此民國所以無一甯歲也。此等小亂。殺人猶不多。倘不設法消弭。則時事日非。某國煽其共產之焰。欲以中國爲第二德國。而其他諸國又深嫉共產主義。亦以中國爲第一防線。果中國共產黨人得勢。則第二國際大戰。必在中國。而國內人爭相殺。猶其餘事。此無他人多食少階之厲耳。今移內部過剩之民。墾殖西北過剩之地。則此問題不可迎刃而解乎。

二、團結五族。中國本合漢滿蒙回藏五族而成。惟彼此語言文字不通。風俗習慣不同。宗教與生活異趣。因隔閡生誤會。故五族共和之大業。至今未克完成。今移內地漢民於西北邊徼。與滿蒙回諸族雜處。助其開墾荒土。則在彼等既可除昔日人稀地曠之患。而所得地價及田畝升科以後之租稅。又爲新增收入。可以有益於生計。在漢民租地耕種。雖情同佃夫。而自食其力。亦免凍餒之憂。如此互助。則感情日洽。團結日堅。久而生活語言宗教風俗均可同化。儼然融合爲一中華民族。如一家然。豈非民國前途之福耶。

三、蕃殖人口。孫中山嘗以中國受外國人口增加之壓迫爲慮。謂百年間人口在美國增十倍。英國增三倍。日本亦增三倍。俄國四倍。德國兩倍半。法國亦增四分之一。中國自乾隆迄今。垂二百年。而人口仍僅四萬萬。百年後苟中國人口增率小。外國人口增率大。則外國以多數征服少數。中國匪特主權莫保。民族且將有滅種之懼。但人口不增之原因安在。救濟之方。法若何。孫中山未詳其說。竊觀中國民族自昔南徙。所至咸沃野。務農有定業。加之帝王獎勵。學者提倡。故繁殖力甲於全世界。今則江河之間地利已竭。農業制度又將動搖。國政紊亂。民不聊生。故人口無增。挽救之道。惟有移殖西北。新闢富源。庶生聚有方。人口繁衍。足與他族抗

衡。

四、鞏固邊圉。中國西北素乏天險。雖築長城難限馬足。故歷代外患恒起於西北。今白人分佔歐美非澳等洲不足。潛來亞洲。批亢搗虛。值中國邊境人少力薄。未能抵禦。以致伊犁流域霍罕及黑龍江以北諸地。早於不知不覺中失去。而吾滿蒙回藏諸昆弟宿昔棲息之所日蹙。關內漢人亦感唇亡齒寒之痛。爲見兔顧犬計。固應整軍戒備西北一帶。然軍隊調動靡常。莫若借本地人民之力捍衛本地。其效大而能永。今西北土著既少。則從內部移數十萬人殖邊。勝於戍數十萬兵卒。築數十萬堡壘以禦敵。計孰妙於此者。

五、增加富源。中國民窮財涸。而不自振拔以改良實業。致貨棄於地而不知採。西北一帶爲尤甚。未闢之山林。肥饒之農地。天然之牧場。無不可爲利用厚生之資。惜皆廢棄於地而不顧。卽以綏遠一區論。平原沃土不下五十一萬八千方里。以租放墾植核計。可活人口一千五百萬以上。今綏區人口不過一百五十萬。墾殖之地不及所有良田之什一。號稱墾殖之田。亦大多荒蕪。據各縣調查報告。每畝平均收穫有不及兩斗者。使每畝能增產價值半元之糧。則每年綏區收入可增一萬五千元。有如此富源而移民開發之。但得指導有人。計劃適宜。則不

獨消納多量資本與過剩人力。國內財富日增。國外貿易日盛。其影響於民生國計者必甚巨矣。

六、裨益學術。滿蒙回藏諸族之血統語言。生活習俗宗教思想。雖與漢人殊。而其歷史文化要有稽考之價值。故研究人類社會學者喜來西北一帶調查。且漢族先祖自葱嶺而東。蔓延於黃河以北。而文化始興。惟因典籍未載。故湮沒無聞。然其表現於化石埋藏於地層者。必仍可供採訪。美國考古學家近曾兩次航海來西北利亞蒙古一帶。冀於人種發源地有所發明。則吾等移民開墾後。常得就近考察。所得不尤多乎。且將來西北一帶。人煙稠密。百廢具舉。交通既便。東西文化遂多一接觸之機會。其影響於學術進步者。又豈淺哉。

自古爲政莫要於得民。大學曰『有人此有土。有土此有財。』論語曰『既庶矣。又何加焉。曰富之。既富矣。又何加焉。曰教之。』西北地廣財裕而未開發。故移墾爲急務之首。移關內之民以實邊虛。則關內人滿之患可除。而大亂之機可遏。五族雜居互助。則團結日堅。而分崩之虞可以永絕。於是休養生息。不過數十年。戶口倍增。斯可與各民族相頡頏。以稠密之人民。雄鎮邊陲。則外人不敢生心。而國土可如金甌之固。且利用天產。振興實業。則財源活潑。用之有餘。

當是時也。政治上不憂帝國主義之侵略。經濟上不患資本主義之壓迫。安心研究學術。正符孔子先富後教之旨。此皆今日開墾西北所希望者。而開墾西北。首在有人。故庶不足患。庶而無用途始足患。然天下用途甚多。在人自尋。譬如燃料。薪盡則有煤。煤盡則用電。未聞有因薪盡而不舉火者。是即有人此有土之理。馬爾塞斯見人口增殖無限而食物增加有限。遂主張限制人口。是無異見薪少而戒人勿舉火。乖謬孰甚。吾國今日西北正患人少耳。倘關內無民可移。則廣漠無垠之西北誰與闢草萊開阡陌耶。惟西北移墾事業。今仍限於內蒙古一帶。遠徼猶在荒蕪。望全國人民與政府以漸竭力推行無遺。則中國前途幸甚。(完)

調 查

●河套農墾調查記 (續)

松介

▲第四 教堂之經營

(一)地面及人口 河套西部。有黃特拉亥河。自河以西。直至五加河。南部約寬四五十里。北部約寬五六十里。均係教堂勢力範圍。河身南起黃河。向東北斜行。約長一百數十里。可澆地千

數百頃。係教堂所開。稍西有楊家河子。長八九十里。可澆地千餘頃。此勢力圈內。村落相望。人口稠密。共計二千餘戶。一萬餘口。教堂十餘處。每處教士一人。居民三四十戶至三四百戶不等。

教堂所在地

居民戶數

烏乃朗(譯音)

七十餘戶

三盛公

二百餘戶

陝垣

四百餘戶

渡口

二百餘戶

蔓會

三百餘戶

東塘

四十餘戶

大法公

八十餘戶

莫奈浪(譯音)

七十餘戶

玉隆永

五十餘戶

準噶爾

一百餘戶

西塘

一百餘戶

黃羊木頭

一百餘戶

楊家河子

二百餘戶

(二)地租 此地一部分為前清光緒二十六年之賠教地。一部分係教堂私向蒙古人承租之地。渠水所及。任便耕種。種地者。均須奉教。地租分數等。上則每頃四十餘兩。四十兩。中則三十餘兩。三十兩。下則二十餘兩。二十兩。麥秋將登。佃戶請教堂派人丈苗。其丈法。用繩約計尺度。

估算收穫之石斗。以定地租之多寡。大約每頃可收七八十石至百石者。地租按一頃計算。僅收五六十石或更少者。照成數折減。如係承租蒙古之地。并會同蒙古人丈苗。每頃於所收地租中。分給蒙古數兩。餘歸教堂所有。以後疏治幹渠。亦由教堂出費。又教堂丈苗。并有獎勵之法。凡勤於鋤草。多加肥料。致莊稼豐實者。每頃少算數畝。地租即可隨以少出。若雜草蓬生者。謂此爲惰農。每頃必按實數納租。（按丈苗納租辦法。不僅後套。凡包頭固陽大余太等處皆然。大約減輕農民負擔。使能安居樂業。日用裕給者。其地自闢。地闢則租更可靠。其課以重租。致令節衣縮食尤苦不足者。則人散而地自蕪。租更不待言矣。孟子所言土地闢。田野治。又土地荒蕪。培克在位者。此亦一註脚也。）

(三)學校及林園 凡有教堂處。必有學校。其主旨大抵側重宗教。余等所至之大法公教堂。其禮拜堂東。有教室三間。中式磚房。南北連續。中一間。學生已散。北一間。學生十餘人。年齡均十二三歲上下。南一間。無椅。學生席炕而坐。約二十人。年齡約六七歲上下。教員均中國人。授國文課本。書籍紙筆。概由教會供給。壁上有天堂聖母等掛圖。又禮拜堂西。新建女生教室二間。門窗尙未畢工。該堂教士。係比國人。約五十歲上下。地方人呼爲文神甫。來中國已逾廿年。身

穿藍粗布長衣。白粗布襪。青布鞋。均帶有黃泥色。操北京語甚佳。渠導至院中。時與院內小孩談話。彼此和藹肅穆。殊無勉強狀態。堂後有林園。種榆木柏木洋槐柳木。又有苗圃。植樹苗種類甚多。園地較平地約低二尺。澆灌甚便。下雨時。院內各處之水。奔匯其中。

(四)管理套西之過去 臨河於一月前始行設治。往時因五原縣境遼闊。知事來去無常。對於教會地一切事項。率取放任。間有訴訟涉及教民者。縣署出票傳人。由教會給一『知道了』之回條。知事亦遂不問。以故大小事權。咸集教會。教會視該處教民之多寡。推定會董數人。如有事故小者由會董處理。大者送教士核辦。教會禁賭博鴉片竊盜等甚嚴。牲畜吃路旁麥黍亦有罰輕者罰款。重者驅逐出境。自臨河設治後。蕭振瀛局長已與教民及教會說明。信教儘可自由。人係中華國籍。一切司法及行政事項。當然由地方官廳處理。以後決不容教會過問矣。

(五)地方輿論及個人感想 套西方面對於教會之評論。言人人殊。譽之者。謂教士自奉極約。個人生活。每年至多不得過五百金。地租所餘。大抵爲辦理教育慈善之用。後套數百里間。獨此處人民得以安存。教會力也。惡之者。謂以教會而違約租地。壟斷財賦。憑陵平民。侵掠領土。并教育行政司法各權。亦僭領二十餘年。喪權辱國。莫此爲甚。凡茲二者。皆非余所忍言。獨念

各教士生長繁華富庶之邦。遠適荒烟蔓草之地。面貌不同。語文各異。披荆斬棘。遂啟斯土。西北連疆萬里。孰非大利所在。余乃惟日優游。安坐以待。尙有面目濡筆論天下事哉。（完）

計 畫

●張家口市政籌備處經過工程及計劃（續第一期）

▲市政計劃如左

一培修大境壩 此壩爲大境門內外及上堡一帶捍水之緊要工程。自西溝至頭道壩計長四百數十丈。約合三里。環抱市之東北隅。爲西市區之藩蔽。西溝及清水河卽彙合於此。兩河盛漲時。水勢汹涌。該壩適當其衝。雖本地有壩工會年年從事補葺。然以經濟不敷。工料不能堅實。頻年恆遭衝損。今春本處開辦。擬從事修築。以工程艱鉅。頗費時日。計水漲時不能完工。因而中止。現在將屆秋涸。擬卽鳩工庀材。堅固修築。爲一勞永逸之舉。

二在清水河上流築擋水壩導水東流 大境門外之清水河。河流向西南灌注。察區西岸之市場首當其衝。舊有護岸石壩一里有餘。衝刷幾盡。商民無力修築。遂致將市場年年坍塌。

毀損房屋不少。該河復折而東南。橫衝大境壩岸。茲擬就西山根。築巨大之擋水壩。向東南斜伸入河。更挖河道引水東流。逕向大境東岸之太平山根。使察區西岸市場一帶。可免水害。水漲時並可將已塌之地。再行淤高。而大境壩北岸。亦減去受水直衝之害。

三開闢新幹路 張垣自古爲漢蒙貿易之區。隔以長城。大境門遂爲唯一之通道。貿易盛時。駱馬牛羊成羣結隊。車擊轂人。摩肩繹絡於途。終日不絕。時形擁擠。爲交通便利計。須另闢一通衢。爰沿大境壩河岸。就原有窄路加寬。并拆去舊城數丈而至頭道壩。計長三里。寬三丈。現已從事工作。一以分大境門之擁擠。二則河東新市區開放時。擬卽於壩之南頭。向東再建一大橋。以爲兩市聯絡之孔道。

四修築大境門經武城街清河橋至河東新村幹路 大境門內向有石路。以車馬頻繁。坑窪不平。較他處爲甚。故先於大境壩口起。向南試築馬路。卽運河中石塊沙土填鋪壓平。以節經費。

五建築玉帶橋 該處爲西沙河水入新東區之水道。現建輕便木橋一座。以便汽車與洋車等往來。至重載大車。則仍於橋旁土路行走。

六建築市場 依從來之習慣。各種小營業。多沿街設攤。現在整理街道。此種小商將無營業處所。擬於各處沿街空地。建築市場。以安插之。

七建築上堡公園 本埠地狹人稠。賜兒山雖爲名勝之地。然距市遼遠。在市區中絕少游玩之地。因就都統公署前之隙地。堆山種樹。築屋建亭。鑿池引水。爲各界休息散步之所。(完)

政聞錄

●西北軍人之特種任務

濟河築路開發富源 移打仗之精神以挖河 以不怕死之義氣而修路 講演

畫圖 指導社會 兵工 兵農 兵學 各大政策

西北當局對於振興實業。開闢富源。提倡文化。啓發民智等。進行不遺餘力。并訓令部下。於本軍應有教育之外。利用時間。作開闢富源。指導社會之事。而其部下官佐兵夫。亦能仰體斯旨。切實踐行。斯誠一舉數得。事半功倍。故急錄之。以餉閱者。

一、濟渠築路。前訓令劉郁芬師長。略謂綏遠所屬五原一帶。溝洫縱橫。河流緩慢。沃野之地。

久令荒蕪。棄自然之利。實可惜之。仰該師全部及第八混成旅。卽行開往該處。浚挖河道。修築路途。墾地種樹。使農業日見發達。以闢利源。而重民生。且該地新到墾民。及舊有居民甚多。苟有所請求。均須力爲幫助。此實最急最要之事業。亦爲永久不磨之勛功。並詳告官兵。共明斯意。移打仗之精神以挖河。以不怕死之義氣而修路。行見地闢農興。近悅遠來。豈惟斯土之幸。國家大本實利賴之等語。昨包甯鐵路開工。劉師長演說。提及此事。略謂抵包以來。督率官兵。日日從事修路濬渠諸事。包至烏藍腦包之汽車路。向嫌狹窄。現由本師三旅官兵加工修理。放寬數尺。烏鎮至五原之路。已由本師四旅官兵修理完竣。現在八旅官兵。修理五原至磴口之路。將來仍擬繼續修至甯夏。以利行旅。四旅一部分官兵。現正挖掘久已淤塞之塔布等渠。以興水利等語。以兵代工。築路濬渠之情形。可以得其梗概矣。

二、修路。清道。勸民。圖書。格言。訓令部下云。軍隊與人民本屬一體。感情固應融洽。知識亦應溝通。西北人民風氣。銅蔽異常。自應積極開導。以便改良。各地駐紮軍隊。於本軍應有教育之外。對於附單所列之社會教育。社會改良各事。務須切實宣傳辦理。是爲己立立人。已達達人之要道等語。至於附單所載。(一)修路——我軍駐紮地方。其四面往來道路。務須分派各部隊

担任。輪班修築。在修路之時。由官長率領指揮。視爲重要之勤務。(二)清道——凡人多聚居之地。污穢叢積。務須視爲最危險之事。宜分配各部隊。每日洒掃。使各處街道十分清潔。方適於公共之衛生。而示人民以模範。(三)勸民——在鄉居民。見聞鮮寡。凡營長團附書記官軍需官各項人員。須酌量抽出時間。分往各村市舉行講演。藉以開發民智。(四)圖畫——於公共聚集及往來經過之區。應於其牆壁上。畫有益人心與感動人心之圖畫。以便印入一般人之腦筋。而資興起。(五)格言——倣照圖畫之位置。於其牆壁上。應標寫觸目警心之格言。例如亡國奴不如喪家之狗。捐軀爲國。視死如歸。飽食足衣。亂說閒耍。終日昏昏。不如牛馬等。此蓋以軍人爲社會教育之導師和社會改良之模範者。所謂模範軍人。誠能名副其實矣。聞尙有兵農政策。因西北察綏各區。荒地尙多。擬訓令部下。分領開墾耕種。農時則從事隴畝。農隙則歸隊訓練。與古寓兵於農之辦法相彷彿云。

●西北之廢物利用

設立廢品改造所

收集廢物改造成品

西北當局念物力之維艱。環顧軍中破爛衣服鞋襪紙片。任其廢棄。甚可惋惜。遂飭督辦署軍需處。察綏二都統署軍需課。設立廢品改造所。收集各部官佐兵夫破爛衣片鞋襪及爛紙等項。改造成品。化無用爲有用。該所早經成立。出品甚佳。是亦晉陶侃木屑竹頭之遺策也。茲將其簡章錄左。以爲廢物利用者之參攷。而彼殄暴天物者。亦可以憬然悟矣。

廢品改造所簡章 (一)名稱。定爲駐京(察，綏)西北邊防督辦公署廢品改造所。(二)宗旨。按

商業性質試辦。專收本軍駐京(察，綏)各部破爛衣片鞋襪爛紙等項廢物。改造他項成品。化無用爲有用。(三)地點。暫借北京(察，綏)公共場所。或廟宇試辦。(四)組織。經理一。司賬一。由軍需處(課)選老成可靠久未升遷之正目或傳事兵充之。工頭二名。設法選僱。學工十名。由各部隊中選拔不及格年幼新兵充之。(五)出品。分二種。(1)裕紙。將所收布類拆洗潔淨改造。售與被服廠做鞋或體操帶之用。(2)黑抄紙。將所收紙類改造。售與各部售品所。或商號。(六)資本金額暫定一千元。先行試辦。俟有成效。再爲擴充。(七)經費。經理月薪洋二十四元。司賬月薪十四元。工頭每名月資十元。學工每名月資三元。共合洋九十元。全所伙食約計月需洋五十元。所內應用之文具油燭柴炭茶葉等費。按月實報實銷。不得超過十元。(八)

開辦費。凡關於購置工作器具。及家具炊爨等物。並修理紙池及其他土木工程各費。統歸開辦費內報銷。但須力求撙節。(九)賞罰。(十)附則。觀此可知其組織之嚴密。經費之撙節。而將來成效。可以預卜。至改造所辦事及工作細則十條。因限於篇幅。從略。

●西北之綜覈名實

延攬真才 慎惜名器

西北當局用人。採用人才及攷試主義。因事擇人。不因人授事。故夤緣引進之積弊。早已革除盡淨。近慨各機關尙有顧問諮議及其他種種名稱。名目混淆。不符定制。特訓令各都統各師旅長及各鎮守使云。有功受祿。爵乃不濫。因事擇才。名始不瀆。蓋國家設官。原有定制。官署用人。亦有定例。名器不容假借。國幣豈可虛糜。無如改革以後。仕途龐雜。賢愚並進。或爲私誼所關。濫予收錄。或因敷衍情面。巧立名稱。無論大小機關。均有顧問諮議以及其他種種名稱。因人授事。隨意命名。不顧名分官制之瀆。遑恤羊頭鼠雀之譏。本督辦有慨於此。亟思嚴格限制。茲特規定。除本署外。其餘各都統署准有顧問四員。參議二員。諮議六員。并須確有資望品學實能辦事者。方准延聘。此外師旅部。鎮守使署。及廳道各機關。一概不許有此閒散駢枝。致淆

名分。而糜國帑等語。此種惡習。全國相染成風。更望有用人之責者。聞風興起。爲中國吏治前途。開一新紀元也。 (完)

大事記

●國內大事記

九月十九日 ●滬團體請抗議加拿大移民新律 ○上海各團體外交後援會電請執政飭外交部向加拿大當局提出嚴重抗議。務須取消該苛律而止。 ●湘鄂贛組織航空隊 ○鄂湘贛三省當局。聯合組織航空隊。并有聯銜電報到京。報告經過情形。請政府立案。

九月二十日 ●亞洲攷古隊之成績 ○亞洲攷古隊此次赴蒙古攷查古物。業已竣事返京。該隊長竹安氏。聲稱。此次經歷五千英里。獲得之物品。均爲無價之寶。且發現穴居人民之骸骨及化石床云。

九月二十一日 ●美國虐待華僑 ○最近華僑與美人衝突。致死者已有數人。美警察廳藉口阻止爭鬪起見。全體拘捕。計三百五十二人。昨經美國移民當局審訊。除在美國生長之二百八十人釋放外。其餘七十二人。將受驅逐云。 ●北京禁止示威運動 ○北京各界因上海九七慘案及滬案重查。定於本日在天安門集合。舉行示威運動。被警廳禁阻分隊遊行。

九月二十二日●民國日報被控○民國日報爲登載九七慘案被控。經公廨傳訊未了。外人干涉言論。咄咄怪事。

九月二十三日●新任葡使今日可抵京○新任駐華葡國公使畢安祺。昨已由滬北上。今日下午可抵京。●學生會援助工會○學生總會通電請全國各界一致援助。并請政府啟封總工會。

九月二十四日●比使對退款要求○比使函請外交部。將綏遠教案賠款及中國所欠繳之國際商學院經費。在此次比金佛郎案退款內扣付。

九月二十五日●漢冶萍礦工人罷工○漢冶萍全體煤鑛工人鐵路工人罷工。離開礦地。因係總局遣派軍隊。以武力封閉工會所激成。

●國外大事記

九月十九日●日本之經營西伯利亞○後藤子爵。現組織三百萬元公司。爲開墾西伯利亞資源之用。其野心亦云雄矣。

●日本貴衆兩院完全被焚○東京十八日電。日本貴族院衆議院今日午後三時起火。完全燒燬。

九月二十日●香港總督派定○香港現任總督他調。英皇派定克利滿提繼任。●英國船塢工人罷工○南哈木頓船塢工人。昨開大會通過議案。令各船工人一律罷工。

九月二十一日●德保守派之對外條件○德國民黨反對和平互障公約。現已通過議案。謂非按下列四項爲談判之基礎。不能加入。(1)協約國不得再提及戰事問題。(2)一般的國際裁兵。必須實行。(3)外國軍隊一律退出戰區。(4)德國不割讓任何土地。此乃爲徹底之保障。●莫索爾問題交海牙法庭審查○土耳其以武力佔領莫索爾。驅逐英人。英莫

可如何。提交國際聯盟理事會。現該會將此問題交海牙法庭審查云。

九月二十二日 ● 法叙仍在激戰中 ○ 叙利亞反抗法國之獨立運動。仍在激戰中。雙方互有損失。 ● 舊金山檀香山間之

飛行試驗 ○ 美國最大水上飛機。定今日再由舊金山直接飛赴檀香山島之無停着飛行試驗。

九月二十三日 ● 巴黎電信罷工二小時 ○ 巴黎電報及電話司機人員。要求加薪和特別津貼。於前日實行罷工。與外間

斷絕音信至二小時之久。據罷工者聲稱。此次罷工二小時。實對當局最後之警告。

九月二十四日 ● 英美對裁兵會議之態度 ○ 關於國際聯盟會所擬召集之裁兵會議。英則頗表示反對。美則謂須俟國

會通過。方能參加。 ● 美政府訓令航空員勿助法攻摩 ○ 謂彼等以美國團體名義助法攻擊摩洛哥里夫會軍之動

作。實干犯美國之律法。應速行退出。

九月二十五日 ● 蘇俄扣留日本赴蒙探險團 ○ 南滿鐵路之蒙古探險團。因有煽動蒙民之嫌。現被蘇俄警察拘押於依

爾庫次克城。 ● 日本飛機大操 ○ 日本飛機大操。二十三日起在東京舉行。期限一星期。飛機二百架。

雜俎

● 詩

讀王船山落花詩有感用原韻

舌存

廿四番風信不乖。功成身退巧安排。羣芳鬪罷春猶在。百子圖開影未揩。窗小硯香殘粉濕。樹陰酒醒亂花埋。落紅自是多情物。化作香泥翠點鞋。

十二闌干半綠苔。春心未肯醉成灰。爲君一笑迴風舞。憐汝多情墮露胎。散向碧天皆佛相。飛如紅雨到春台。護花人老憑誰記。小謫人間第幾回。

空是色耶色是空。曇花一現有無中。前身乍覺圓如月。不翼而飛冷御風。苑北鈴猶驚小雀。江南春未寄歸鴻。幾生修到今離別。待補情天返玉宮。

回頭笑語怯難支。嫵媚偏存半額眉。睡久好燒高燭照。香留欲捲一簾遲。仙胎骨換三千劫。妙蒂胸吞八九知。小別春光明歲早。看儂開占百花時。

(未完)

不如西北去

長沙辜天祐

張垣湘省同鄉組織墾殖協社議移湘民往五原開墾因作短歌十首以便流傳桑梓爲招墾勸農之一助爾

不如西北去。此語實非誇。後套黃河曲。今移墾地卽在後套。長城紫塞遮。草豐宜畜牧。土沃利桑麻。更講新文化。提倡勞動家。

不如西北去。馮督惠恩厚。墾戶每丁男。携家三四口。領耕一頃地。別贈二十畝。與汝爲世業。安樂且長久。故鄉習氣重。治理苦無門。不如西北去。團體辦新村。地仿井田古。人惟力役尊。十千同比耦。五畝足雞豚。土地國之寶。農田利最豐。經商憂本折。作客畏途窮。不如西北去。墾畝關南東。別開新世界。來作主人翁。

切莫戀家鄉。家鄉有何樂。無錢事事難。失勢人人邁。生活與年高。世情同紙薄。不如西北去。努力勤耕作。吾鄉興農學。新理師亞歐。苦於生殖滿。無計廣田疇。不如西北去。萬里關菟裘。有此發展機。問君胡夷猶。既有室家累。尤爲衣食忙。不如西北去。開墾事農桑。此日論開化。前朝數帝皇。祖宗流域地。孫子又還鄉。莫謂他鄉遠。他鄉味更甘。牛羊畜被野。麥稻穫盈擔。水自黃河灌。肥從白草含。不如西北去。西北勝湖南。莫謂湖南好。湖南苦似芩。今年遭大旱。去歲患靈霖。米珠薪若桂。火熱水益深。不如西北去。遍地是黃金。莫謂湖南好。湖南不可留。錢糧須預納。厘稅要加抽。遍地皆兵匪。連年遇歉收。不如西北去。善政樂優優。

(完)

格言

臨事讓人一步。自有餘地。臨財放寬一分。自有餘味。 高攀龍

大丈夫立定志向。當做一件人所不能做的事。 句入葛蘇

新劇

黃浦潮 上海大流血案

(續)

尹血兒

第五幕 各界罷工

佈景之說明 係一馬路形式。兩旁皆舖。每舖之前以一小桌代作櫃臺之用。上列各種貨物。每一櫃臺之內坐一商人。有算帳者。有看報者。有理貨者。有閱書者。亦有閒觀望者。情形不一。以示商場之真態焉。

角色之說明 學生游行講演隊二組。裝飾一切如前。商人十名。皆着各種商人便服。

劇情之說明 學生因憤英人待我不如牛馬。乃去要求商會通知各舖一致罷市。會長雖允其請。無如從者甚少。學生會乃派出會員多人。往各馬路每舖門前跪一學生。苦苦哀求一致對外。商人大受感動。於是紛紛閉戶。並下半旗誌哀。自是遠東第一繁華商埠。竟成悽慘世界。英人狼子野心。猶以我國全國無所表示。故仍不生戒慎。日以屠戮爲能。我親愛之同胞。從此當知國民外交運動之重要矣。

第六幕 外交失敗

佈景之說明 係一開會之會場式。四壁懸以各種美術掛圖。中外地圖。及上海租界圖。中設一長方桌。右旁安置靠椅三把。爲中國三大專員之座位。左旁安置靠椅六把。爲六國委員之座位。桌之上方另設一席爲中國特派上海交涉員之座位。俾其面向外坐。桌上仍用白布桌面一塊。陳設玻璃瓶一對。花盆四個。鐘一架。每一座前置墨水一瓶。記事簿一本。臺之左方另設一席。以便錄事坐以書記議案之需。桌上所置如第三幕。前臺之入口處。另設一桌上備玻璃杯十個。餅乾四碟。茶壺一把。以便僕人於開會後敬客之用。會場左右立中國兵數名。裝飾非常整潔。舉動非常文明。以示華兵程度遠在英人之上。僕人二名。各立桌之左右。以應指使。態度亦須非常恭順。

角色之說明 中外與會人員。均着禮服。各人胸前用一布條。如第一幕。惟其所書之字各不同耳。僕人二名。華兵數名。亦皆各着其應着之制服。

劇情之說明 自慘案發生後。我方提出抗議多次。英日皆無滿意答覆。後因血潮日有擴大之勢。使團乃派代表六人到滬。會同我國特派之三專員調查一切。證據均屬確實。於是乃開會議於新區交涉署。我方提出下列十三條件。(1)撤銷非

常戒備。(2)所有因此案被捕華人一律釋放。並恢復公共租界被封及佔據之各學校原狀。(3)懲兇。先行停職。聽候嚴辦。(4)賠償傷亡及工商學因此案所受之損失。(5)道歉。(6)收回會審公廨。完全恢復條約上之原狀。華人犯中華民國刑法或工部局章程。須用中華民國名義為原告。不得用工部局名義。(7)洋務職工及海員工廠工人等。因悲憤罷業者。將來仍還原職。並不扣罷業期內薪資。(8)優待工人。工人工作與否。隨其自願。不得因此處罰。(9)工部局投票權案。甲。工部局董事會及納稅人代表會由華人共同組織之。納稅人代表額數。以納稅多寡比例為定額。其納稅人開會出席投票權與各關係國西人一律平等。乙。關於投票權須查明其產業為已有的或代理的。已有的方有投票權。代理的其投票權應歸產業所有人享有之。(10)制止越界築路。工部局不得越租界範圍外建築馬路。其已築成者由中國政府無條件收回管理。(11)撤銷印刷附律加徵碼頭捐交易所領照案。(12)華人在租界有言論集會出版之自由。(13)撤換工部局總書記魯和。外交部將來對於此案續提之條件應請保留。合並聲明。中華民國十四年六月十二日。」

會議三次皆無效果。於是兩方代表乃各先後回京復命。死者之冤既不能伸。生者之恥更不能雪。強國無公理。弱國無外交。人道云乎哉。正義云乎哉。

第七幕 潘大受死

佈景之說明 臺之左角用大黑板兩個。上寫(黃浦江)三大字。板後暗伏二人。各持水鎗一支。俟潘大受跳入江時。急將水鎗往上開放。以代人溺江時水往上湧之勢。

角色之說明 潘大受作商人裝束。手持報紙一張。並信數封。其妻身穿布服。其子作學生裝束。行路人二名皆着便服。

劇情之說明 各界男女志士多有爲慘案自盡者。如劉光權。應銀壽等。皆悲觀派之最著者。自外交失敗後。又有榮陽潘大受君（商界名人）痛憤過甚。亦步劉等後塵。未死之先。曾作遺書數通。勸告各界同胞上下一心。方可對外云云。潘君家屬得兇信後。其妻率領幼子雇工撈屍。多日未獲。哀痛過甚。欲以身殉。其子苦勸乃止。後潘君子願加入學生軍。以繼乃父未竟之志。而爲國家報仇云云。其母見其意誠。亦祇得含淚以允之。嗚呼慘矣。

幕終（完）



敬啓者本社以西北地方面積占全國之半。而地廣人稀。交通阻滯。國人耳目遠隔。殆久視同化外。邇幸西北當局。銳意經營。凡關於移墾交通教育實業各政策。國人均異常注意。馳東探詢。絡繹不絕。每苦事冗。不暇裁覆。良用歉然。兼自滬案發生。此間對外。尤極激昂。經濟絕交。實行數月。到底不懈。頗足爲國人增氣。全國視聽。早已爲之一傾。而外埠各報。祇以關山遙阻。致多語焉未詳。同人等忘其謏陋。特應時勢需要。創設本刊。原期共見共聞。與國人以總答覆之機會。業已發行數册。奉塵左右。謬承各界歡迎。郵函訂購者。尤應接不暇。供不應求。且感且愧。當益策奮。力求進步。爲此徵集台端雅意。倘辱過愛。願閱長期。則請將左列訂單。填寄本社。自當源源奉寄。藉領教益也。肅此佈臆。順頌日祉。

西北彙刊社啟

茲訂閱

西北彙刊自第 期起至第 期止計洋 元 角 分

連同郵費洋 元 角 分共計大洋 元 角 分一併

寄上希即

查收掣發收據按期照寄爲盼此致

台照

姓名
住址

中華民國 年 月 日

西北彙刊訂單

本刊價目

每期一冊銅元八枚 每月四期大洋一角 半年二十六期大洋五角五分 全年五十二期大洋一元 郵費本國及日本每期一分 歐美各國每期四分 倘欲訂閱者請將訂單裁下。填列姓名住址。連同價目郵費款項。寄交張家口小營房街本社。自當按期寄奉不誤。（訂報函件。務請掛號。空函恕不奉覆。）

西北唯一之週刊 西北彙刊 欲謀普及 闢爲公共言論機關 故半購半送

本刊每週出版一冊約萬五千餘言內分影片研究評論譯著調查計劃演講政聞錄大事記特載雜俎等材料豐富主張穩健調查翔寔編輯審覈定價低廉（祇收回紙本半價）寄送迅速凡注意西北者不可不手一編也

張家口小營房街一號西北彙刊社